

Alþingi  
Erindi nr. P 139/1780  
komudagur 23.3.2011



Alþingi  
Nefndasvið Alþingis  
Austurstræti 8-10  
150 REYKJAVÍK

Garðabæ, 18. mars 2011  
Tilvísun: 2011030066/000.2

**Efni: Umsögn Garðabæjar um tillögu til þingsályktunar um uppbyggingu náttúrugripasafns á Selfossi 283. mál, þingskjal 326.**

Bæjarstjórn Garðabæjar barst beiðni frá nefndasviði Alþingis, dags. 7. mars 2011 um umsögn um ofangreint mál.

Bæjarstjórn Garðabæjar fagnar því að lögð hefur verið fram tillaga til þingsályktunar um uppbyggingu Náttúrugripasafns Íslands en gerir athugasemd við tilgreinda staðsetningu safnsins á Selfossi.

Eins og fram kemur í þingsályktunartillögunni tók Náttúrufræðistofnun Íslands til starfa í nýju húsnæði í Urriðaholti í Garðabæ fyrir skömmu, nánar tiltekið í október 2010. Aðstaða stofnunarinnar er til fyrirmyndar í nýja húsnæðinu ekki síst hvað varðar geymslu gripa í safnskálum sem uppfylla strangar öryggiskröfur og eru m.a. rykþéttir með nákvæmum loftræsti-, hita- og rakastýribúnaði. Forstjóri og starfsfólk stofnunarinnar hafa lýst yfir sérstakri ánægju með nýja aðstöðu sem var alger bylting frá því sem stofnunin hafði búið við frá upphafi. Garðabær og Urriðaholt ehf. sem er eigandi landsins hafa lýst yfir vilja til þess að Náttúruminjasafnið komi í Urriðaholt í kjölfarið og tilgreint lóð við hlið stofnunarinnar sem æskilegan stað fyrir safnið. Komið hefur fram hjá forstjóra Náttúrufræðistofnunar, Jóni Gunnari Ottosyni að honum lítist vel á þá hugmynd. Urriðaholt ehf. hefur þegar látið teikna tillögu að sýningarhúsnæði fyrir Náttúruminjasafn. Hægt væri að hefja framkvæmdir með litlum fyrirvara, enda er lóðin tilbúin og skipulag frágengið.

Í lögum um Náttúruminjasafn Íslands 35/2007 kemur fram að Náttúrufræðistofnun Íslands sé vísindalegur og faglegur bakhjarl Náttúruminjasafnsins og að stofnanirnar skuli hafa með sér náð samstarf skv. sérstöku samkomulagi þar um. Einnig er gert ráð fyrir að vísindasöfn Náttúrufræðistofnunar séu ásamt safnkosti Náttúruminjasafnsins undirstaða fræðslu- og sýningarstarfsemi safnsins. Af þessu má ljóst vera að gríðarlegt hagræði verði af því að þessar stofnanir séu í næsta nágrenni hvora við aðra, bæði hvað varðar samvinnu starfsfólks og umsýslu safngripa. Auk þess byði nálægðin upp á mun fjölbreyttari sýningar en ef safnið væri staðsett annars staðar.

Bæjarstjórn Garðabæjar vill jafnframt vekja athygli á mikilvægi þess að við uppbyggingu Náttúruminjasafns verði sýndur sami metnaður og framsýni og raunin var með byggingu Náttúrufræðistofnunar. Tryggt verði að húsnæðið uppfylli þau skilyrði sem gerð eru til slíkra stofnana enda eru í safnkosti safnsins margir mjög dýrmætir gripir.

Hverfið Urriðaholt í Garðabæ var frá upphafi skipulagt með umhverfissjónarmið að leiðarljósi. Í hverfinu sjálfu og umhverfi þess er einstök náttúra, m.a. Urriðavatn og Heiðmörk. Engu að síður er Urriðaholt vel staðsett á höfuðborgarsvæðinu með greiðum umferðartengingum til allra átta. Í skipulagi hverfisins er unnið með forsendur sjálfbærrar þróunar og stefnt að því að Urriðaholt skari



**GARÐABÆR**

www.gardabaer.is

fram úr í umhverfismálum. Þótt uppbygging hverfisins hafi tafist vegna aðstæðna í þjóðfélaginu hefur í engu verið slakað á þeim kröfum sem gerðar eru í skipulagi þess og varða umhverfisvernd. Áherslur hverfisins fara því einkar vel saman við starfsemi Náttúrufræðistofnunar og Náttúruminjasafns Íslands og gæti skapast þar gagnlegt og skemmtilegt samstarf.

Meirihluti gesta í náttúrugripasöfnum eru skipulagðir hópar skólafólks og ferðamanna sem koma með rútum og því er Urriðaholt með sínar góðu tengingar við Reykjanesbrautina t.d. góður kostur fyrir slíkt safn. Á opnu húsi sem haldið var í Náttúrufræðistofnun laugardaginn 5. mars sl. komu yfir 5000 manns í heimsókn þrátt fyrir aftakaveður. Það undirstrikar bæði góða staðsetningu í Urriðaholti og þá þörf sem er á sýningarstöðu fyrir náttúrugripi.

Samantekt:

Bæjarstjórn Garðabæjar leggur til að Náttúruminjasafni Íslands verði valinn framtíðarstaður í Urriðaholti við hlið Náttúrufræðistofnunar Íslands.

Rök:

1. Mikið hagræði er af því að stofnanirnar séu á samliggjandi lóðum. Í lögum er kveðið á um náð samstarf þeirra á milli og að Náttúrufræðistofnun sé bakhjarl Náttúruminjasafns.
2. Nálægð stofnananna einfaldar mjög umsýslu safngripa og býður upp á fjölbreyttara sýningarhald.
3. Mikilvægt er að horfa til framtíðar við uppbyggingu Náttúruminjasafns og tryggja að húsnæðið uppfylli þær kröfur sem gerðar eru til húsnæðis þar sem verðmætir safngripir eru sýndir.
4. Í Urriðaholti er skipulagið unnið með náttúruvernd að leiðarljósi og gert ráð fyrir að skólar hverfisins verði í fremstu röð í þróun umhverfisvænna skóla.
5. Náttúra hverfisins og umhverfis þess eykur enn á gildi náttúruminjasafns og auðveldar safninu að miðla fræðslu og upplýsingum á lifandi hátt.
6. Urriðaholt er vel staðsett í miðju höfuðborgarsvæðisins og þar er greiðfært í allar áttir.

**Samþykkt í bæjarstjórn 17. mars 2011.**

Virðingarfyllst

Gunnar Einarsson  
bæjarstjóri

Samrit sent:  
Menntamálaráðherra  
Þingmönnum Suðvesturkjördæmis